

四庫全書

集部

欽定四庫全書

兩宋名賢小集卷三百三十七

宋 陳 思 編

元 陳世隆 補

古梅吟藁一

吳龍翰字式賢新安人咸淳元年領鄉薦授編校國史院實錄宋亡不仕築樓三層終日吟嘯其中樓前有古梅一樹即以自號

曉發姑孰城

鷓鴣啼驚夢，歌春枕花落。迎風打曉窓，攜杖攬先出城去。
角聲吹月墮寒江。

浙江姚樓觀水月

翠滾玻璃萬頃秋，長江又掛水晶毬。水光月色梅邊客，
今夜會盟江上樓。

晚舟過臨平

烟鐘春起夕陽愁，淼淼臨平春事幽。惟有風蒲愛吟客。

岸邊繚亂縮行舟

春晚留淮上

淮山歷歷春雲淡
淮水湯湯夜月輝
此處杜鵑啼不到
江南行客未成歸

贈謁士

一掬鄉心寒似月
半生行跡過于雲
春風滿擔詩千首
是處青山留得君

白紵詞

吳宮煙水碧迢迢瓊樓十二凌青霄北方佳人顏如花
素衣濯濯明朝霞雲母屏風珍珠箔香銷金鴨春寒薄
璧月流光羅綺筵白紵舞殘月欲落君看月落夜潮平
吳江濶兮越江深吳王醉兮越王醒

嘉禾舟中

天與東風便千錢買一舟嘉禾三月路陰木四山秋野
色緘詩思鶻聲替客愁烟波渺無際是處可盟鷗

嘉禾沈園

景物何其異虛岩人力成清池沈鳥影高樹落蟬聲花
日樓臺麗香風簾幙輕我來一吟賞不惜買杯傾

重陽客中

愁裏重陽近他鄉酒易酤秋風詩鬢短寒夜客燈孤
筍笠月穿破荷衣霜打枯有懷吟未就端不為催租

東劉後村先生四首

天祿臞仙後代孫魏科幾世屬名門千年絕學追先聖
四海真儒仰後村直向天邊扶日月只從筆底轉乾坤

年來諸老凋零盡惟有靈光獨自存

玻璃萬頃海天秋相國如居天上頭錦帳圍山丹荔熟

銀梭織水子魚遊地靈自古稱多士人物當今列上流

二季一翁家學在湄洲即是蜀眉州

先生莆人二子能踵其學

雪碗冰甌淬筆鋒篇篇琢出玉玲瓏鶴鳴遠岫千林曉
鯨展洪濤萬里雄暮雪寒梅吟思外春風芳草夢魂中
詩瓢行脚半天下多謝先生棒喝功

騎却青鸞上禁林岩岩聲價重于金花磚日轉瓊箋暖

蓮燭星歸玉漏沈
翰墨挈來三昧手
絲綸畫出九重心
春風已築沙堤路
天上虛星屬意深

西湖曲

十里風光煙水白
嵯峨帝城紫霧隔
笛聲吹斷蒲葉風
鷺飛界破青山色
湖波鱗鱗織成縠
翠蓋紅幢機上簇
長安富兒美少年
馬行紫陌香氣撲
畫舫誰家窈窕娘
半額鵝黃時樣粧
玉手折花嬌無力
花枝斜掛銀絲長
隔花躊躕意相屬
稍稍談笑間餘香
夕陽西下漢水遠

無計問覓雙瓊璫巫山高哉但入夢安得插翅飛其傍
君不見吳姬采蓮自唱曲君王尚在舟中宿

拜林和靖墓

老鶴高飛入白雲空餘殘照管孤墳清風千古鎮長在
見著梅花如見君

久客湖海買舟西還

萬里煙波興渺然片心如在灞橋邊歸裝詩少不成擔
自拗梅花湊滿船

馮永之號冰壺工水墨丹青

半生江海冰壺翁
擔風荷雨七尺筇
爛嚼扶桑紫金椹
玉樓光徹十二重
飽喫孤山白玉花
一鑿九竅開玲瓏
能鉦明月鑄雙眼
故能搜索異景窺
神功能穿星斗掛
胸次故能神遊八極之
鴻濛手撼煙雲出
硯石酒酣奮
筆驅雷風迴山轉
海有力量頃刻鵝溪
幻出白練之寒
江碧玉之奇峯
瀟湘洞庭忽在眼
冷落煙竹蒼梧空
碧天萬里渺無際
但見隱隱孤飛鴻
江門過雨涼如許
木

落瀟瀟秋滿浦月明何處起漁歌小艇人歸急搖櫓
沙漠漠洲渚昏無數寒鴉棲古渡景物變態雖無窮筆
端有口一一吐研丹吮粉尤精奇直與王爵爭毫釐寧
肯沒骨媚時好逸氣往往追徐熙一點春風幾花卉化
工權柄君所私獻之牒牛韓幹馬滕王蛟蝶僧繇魚下
筆衆妙各俱足開卷錯落千珠璣顧家層樓連天起俗
士那敢窺藩籬嘔心抽思何自苦乃使肌骨化作枯松
枝君不見梅邊有狂客風饕雪虐寧忍飢吟軀未老貌

先老不覺兩鬢紛如絲

靈金山觀金燈

嵯峨靈金山峭壁偕天長
巔岼萬蒼翠無復敢頡頏
登臨勞遠目久羈塵俗韁
天風送筇屐此願今一償
所喜侍老親顛願升崇岡
琪樹藹柔絲瑶艸超羣芳
松聲入幽懷妙樂非笙簧
好鳥相勸酬醉我林中觴
我吟遊仙詩客和招隱
章起舞涕懽笑人影亂夕陽
何方阿堵女山北敞虛堂
石池閼甘泉瓦爐騰妙香
昔言山有靈金

燈夜呈祥信哉華嚴經佛眉施白光澄公有妙力一笑
通禪房詎知山石間而有金光藏掩嗔下朱景山氣相
激揚若以色見佛于法參與商我生事迂濶咄咄顛復
狂讀書獵千古浩氣凌八荒乃欲落鬚髮掬水曹溪傍
吹以無孔笛例騎牛一場手擊混沌開有此硬脊梁指
點生死根棒喝行諸方

辛酉秋吳畫士寫神

功名自有兜鍪輩榮辱寧甘蓑笠翁煩作田園秋興畫

短簷斜日稻花風

秋崖先生招飲荷葭塢席上賦詩

相公潭水清于玉翠屏四面環書屋石梯齒齒登蒼崖
老樹晴烟千頃綠好花對人無俗姿春色盈盈園虛谷
歸來庭院碧參差八窓玲瓏有修竹先生長嘯臨清流
茱萸辛夷香滿洲浪呼迪輩偕春遊綠醅深注碧玉甌
我醉起舞相勸酬願祝先生相業侔伊周運留侯帷幄
之籌橫萊公野水之舟莫負蒼生望安石東山高卧凌

清秋

先生所居
即相公潭

京城寓居春日

春城庭院柳風輕
簾影玲瓏受曉晴
紅日半窓吟夢覺
啞啞牆外賣花聲

宮人斜

碧石重重鎖墓門
蘭膏點火照黃昏
春風幾度生芳艸
還似君王舊日恩

春夜隔江望揚州城

煙抹蕪城熨不開
夜深燈火照樓臺
欲披紫綺過江去
月冷滄洲待鶴來

數年前有小詞
微雨後落花天
嬌態病懨懨
怕

人猜著是相思
成日不開簾
寶釵橫蟬鬢
亂院宇
侍人歸盡
緩移蓮步
玉蘭前
纖手掐花鈿
月夜

與客飲梅花下
一姝歌前詞
復出箋
徵余新作

月夜梅花下
開樽誰主賓
梅花嬌欲語
讓我白頭人
娉
婷樓上女
無乃花中神
下樓欸懽笑
莫惜拋千金
纖纖

出素手為我彈瑤琴自言諳古調妾心合君心感君纏
綿意未彈先有情妾佩明月光妾衣雲霞輕共君驂白
鳳一息超玉京君看天帝女嫁與牽牛星天河萬里長
鵲橋歲一陳安得河水乾夜夜長相親君能挽天河一
洗八極塵

宮詞

舞罷霓裳寶髻垂桃花扇底暖風吹夜深內殿重開宴
手撚燈花畫翠眉

秋崖先生以紅石見寄

彤霞鑿石玉晶瑩
琢出羲之風字形
却著寒松蒼石下
研煙傳寫相牛經

心遠堂

飄飄謫仙子
閉門逃世諠
達哉柴桑翁
心遠地乃偏
羨公隱廛市
高拍前人肩
園林富花木
景象羅春妍
翠鳥鳴高枝
白魚游深淵
魚鳥欣有託
吾廬興悠然
詩瓢貯烟雲
茶鼎烹銀蟾
有此佳絕處
那訊名利鞭
鵲尾聞妙

香片心超九天淵然消萬慮流光緯三田乾坤任簸弄
追蹤古倭侏

持敬堂

大哉紫陽箴誠為百世師心法故能傳心印幾能提明
明道統燈于此接光輝端居儼帝臨暗室疑神窺立足
千仞淵生怕傷髮膚兢兢一寸心炯炯冰雪壺脫帽藐
王公無乃酒狂徒蹠踏漁陽鼓傲態逐刑誅我則持以
敬譬如龍戀珠斷斷貓捕鼠綿綿雞哺雛守之戒勿閑

意馬防馳驅

層翠樓

結樓書屋傍，獨占林塘幽。
飛簷瞰寒碧，照影虹霓浮。
層巒萬蒼翠，峭屹生戈矛。
黛眉與螺髻，故故含嬌羞。
此時樓中人，片心隨白鷗。
風吹烏紗帽，露滴紫綺裘。
白雲入我望，逸興何悠悠。
沈湑供晨飧，酌以碧玉甌。
朝曦散朱景，燕約十二樓。
願言追黃鶴，致身八極游。
慷慨笛聲發，渺渺凌滄洲。

春寒

二月漫漫雪滿山羣芳空向雪中看幽亭酌酒先沈醉
要為小園花饒寒

凍吟

座右插梅花座右橫詩筆風雪墮寒肩先生方抱膝

春興

聞說春醪熟提壺喚客嘗乾坤一釀甕花氣百和香

別吳中三年寄湖上一二知己

麥秋天氣覺清和老盡春風庭下莎曉月荒山啼蜀帝

夕陽高樹咽齊娥三年寒我滄波約一夜思君白髮多
世路不堪重著脚相期何地埋漁蓑

兩宋名賢小集卷三百三十七

欽定四庫全書

兩宋名賢小集卷三百三十八

宋 陳思編

元 陳世隆補

古梅吟藁二

壽鄉衮訥齋先生三首

華衮褒榮御墨鮮堂堂劍珮在凌煙十三相後功為最
五百年間遺有傳落落甘霖施后土岩岩鉅石補青天

太平有策安排了
浯水清風崖可鑿

世態浮雲無定形
先生綠野竟留情
詎知寶祐老臣在
又見金陵新法行
洛邑幾時歸赤鳥
東山再起答蒼生
不堪局面遲一著
願祝薇垣星更明

時下大
全當國

當年河嶽已儲神
理亂分明關一身
瑞應麟書知孔子
恩光鳳詔見庚申
世臣喬木蒼蒼日
驛使梅花歲歲春
笑指紫陽山作壽
會看重慶喜尤新

先生生于
庚申之冬

感興四首

多病頻辭客無人自掩扉
斷松供藥火葺葉補漁衣
日月雙丸疾乾坤一粟微
不須求外道悟此是玄機
野興在漁艇風潮不憚勞
苔生肥石骨水落瘦溪毛
霜重稻梁熟天清雁字高
醉餘歌古調人事折秋毫
閉門逃俗客攜酒過禪關
竈古茶煙斷殘碑雨蘚癡
秋僧行影瘦夜鶴病翎寒
片月隨人到孤琴對佛彈
百事謀何拙一閒夢亦清
定交毛穎子結怨孔方兄
鶴影雲煙瘦蟬聲風露輕
寸心虛白久蛻骨待丹成

金陵寓樓居

樓中有酒客身閒約住孤雲共往還
搖落碧挑春欲去
倚闌無語看鐘山

過涇邑水西縣尹先伯祖嘗為邑簿領耆儒有識者

客裏身無事乘閒過水西
清波明白鷺綠樹帶黃鸝
酌酒道旁飲吟詩石上題
邑中逢故舊坐定說環溪

南陵道中迫暮投茅店四圍率敗籬
令僕夫環卧

故山三百里歸路正羊腸密樹標茅店荒池界竹塙僕
眠如鹿伏我倦背龜藏素志非南阮丈夫掃八荒

泊蕪湖縣

古邑蒼江曲鱗鱗華屋橫酒樓歌妓集漁市販夫行野
濶雲無勢江流月有聲橋邊詩思繞譙鼓更分明

庚申冬壽秋崖先生

瑞宿當年降世間祁山深處著仙壇梅開冰壑珊瑚瘦
岸聳暗空碧玉寒清氣胚成龜鶴相丹田煉就虎龍蟠

待教鬚鬢渾如雪恰寫耆英與世看

九日

秋雨梧桐退老時寒城九日正霏霏功名不直三杯酒
世事直如一局碁頭且插教黃菊滿手今莫負紫螯肥
壯懷無復登臨恨破帽西風一任吹

春晚郊行

芒屨竹杖出柴關檢校園林脚不閒翠幄初張花結局
錦棚未解筍排班煙波鷗鷺春風外桑柘牛羊夕照間

野興不須邀客共一尊
白酒對黃山

秋日游竹會寺

修竹陰陰古道場
誰憐兵火地荒涼
晚山俱似佛頭綠
秋艸不如僧髮長
白酒莫辭今日醉
黃花仍作去年香
禪翁留客殷勤甚
相對藤牀話夕陽

子陵釣臺

峭壁千尋屹曉寒
何年人插釣魚竿
煙霞不受衣冠浣
天地那如蓑笠寬
幸有同肩黃屋貴
不妨伸脚白雲端

能令漢室亦增重可作巢由一例看

夜泊富陽

片帆東去一鷗輕消得天公十日晴新酒一樽詩幾首
故鄉千里月初更煙收山翠揩摩淨風軟江波熨貼平
苦是狂懷費消遣船頭吹笛到天明

別厲制使

何日林間理故書客中歲月只蘧廬糴糧半給梅花鶴
燒葉餘分雪後驢蝶夢悠揚家國遠雁行零落弟兄疎

寒花到了自蕭索不是東風不管渠

天目道中

天目峯前小駐驂長松夾道碧鬢髻客懷寂寞秋般淡
醉態朦朧午正酣山色儼如嚴父面鳥聲還勝俗人談
何年來此種芝朮乞與道人雲一龕

春雪

一雪滿天地三春景更妍鶴梳瓊羽落蝶舞粉衣翩嫩
柳飄新絮殘梅補落鈿東風初解凍洗手破輕煙

嚴灘對月憶雪壺亡弟

卯君看月此徘徊
今來月明君不來
安得清光刀剪破
為分一半到泉臺

婺源道中憩午二首

小息吟身古木陰
詩情羞澀錦囊輕
風煙不受人收拾
擔閣行山半日程

滿路黃塵人往還
黃塵點污幾青山
便投山店睡過午
要放詩魂出世間

濯足五溪城

東風吹水綠鱗鱗
小漱清寒入齒齟
萬里流邊濯雙足
恐行五嶺澗晴雲

登會稽山

越上今為客
息肩春樹林
啼鶻歸夢斷
落日旅愁深
詩紀一編史
琴傳千古心
會須重過此
禹穴一登臨

春日吳中

照人芳樹遲遲日
吹面垂楊拂拂風
客思一筇攜不盡

鳥聲多在落花中

嘉禾書所見

翠幙重重護曉寒
窓間金鴨篆烟殘
芳情不采閒花草
獨倚闌干看牡丹

荷花四絕

一機蜀錦著紗籠
不放纖塵到水宮
但覺曉寒金掌重
仙人危立白雲中

右露

醉臉潮紅嬌欲眠
玉幢移影蓋嬋娟
一奩晴色開明鏡
暖熨金爐起碧煙

右日

颭颭涼生水國秋
可憐無計解花愁
飄然一葉隨流水
付與真人駕作舟

右風

寒聲敲破玉琳琅
綰斷鴛鴦雙夢長
幾斛明珠收不起
巧粘翡翠絡紅粧

右雨

俠客行

擊筑復擊筑
欲歌雙淚橫
寶刀重如命
命如鴻毛輕

烏棲曲

風敲玉鉤蝦鬚垂
寒烏棲月萬年枝
香薰翠被春宵永
玉臂曲作珊瑚枝

散髮

玲瓏窻戶午晴時
散髮林間自一奇
烏睡香奩花影動

蟬吟涼境柳陰移
高山流水琴三弄
明月清風酒一卮
要是閉門防俗客
莫令到眼敗吾詩

讀岳武穆王傳

鬼域為妖天地昏
將軍那可一朝存
泰山頽喻哲人死
東海旱為孝婦冤
當日主和甘下策
到今無計復中原
清風凜凜一編史
拭盡英雄幾淚痕

行春次俞兄韻二首

幾日春愁不出行
園林又是了清明
春風桃李一場夢

夜月江山千古情
吟倚長松伺鶴到
坐臨釣石看雲生
此懷不解自拈出
漫譜離騷入笛聲

多謝春風相此行
馬啼千里夕陽明
故人楊柳正年少
知己青山舊日情
思滿天涯芳草遠
望窮江際暮雲生
同來佳客自不俗
相對松陰聽瀑聲

淳熙丙申二月晦
翁歸婺源先曾大夫
因隨杖屨
遂掛名于弟子之列
乃以所著書說以求
正晦翁
可之又嘗投書論
易甚詳龍翰不學
縉玷家聲因

讀遺文有作數語亦所以自勉云

吾祖曾師雲谷仙讀書直下悟諦筌道參太極本無極
易論先天與後天綠遍春風窻外草香浮夜月沼中蓮
派分一勺濂溪水道統綿綿萬古傳

再過孤山

一函鶴骨已塵埃空築孤山碧玉臺添種紅蓮千萬朵
梅花從此不須開

兩宋名賢小集卷三百三十八

欽定四庫全書

兩宋名賢小集卷三百三十九

宋 陳思 編

元 陳世隆 補

古梅吟藁三

冬夜二首

讀罷牀頭一卷易
曉風乾盡銅壺滴
起傍危闌嘯一聲
月明何處人橫笛

一屋白雲無鎖鑰酒酣要摘梅花嚼相逢石鼎老彌明
吟罷松梢月欲落

晚舟泊長河

詩客行裝少孤舟一葉輕寒鴉隨日落秋雁破霜鳴山
色攢心事江聲咽世情故鄉無百里酤酒話歸程

冬夜山中

寒入雁聲霜滿地香沈梅影月當崖獨鶴歸來童亦睡
微風簌簌落松釵

贈詩客梅窓

騷人行脚遍天涯何處青山不是家
惆悵舊時雲外鶴
結巢窓外守梅花

樂府四首

妾心江岸石千古無變更郎心江上水
倏忽風波生
瑟瑟涼風來妾身後秋扇安得復炎熱
相攜不相厭
製衣寄夫婿妾有冰雪段中間連理枝
不忍剪教斷
殘月小樓西鶻啼思欲迷妾夫在天南
何不那邊啼

夜興

山房靜對碧巉岼與客歌騷夜未闌
客去燈寒眠未穩興隨明月在闌干

辛酉秋在京殊久日一到湖上

湖上青山只麼閒未須詩屋近山間
客邊有酒身無事日日一來湖上看

讀家集

先曾大父友堂幼從諸老遊聞道最早與簽判曾伯大

父判簿曾伯大父一意刻苦為學隸萼卓然以文
名家友堂遺文今所存者書說四十卷易論四十卷
史評七卷詩文而已龍翰不學不足以得其箕裘
之傳謹識其悲云

吾家友堂翁硯影雙鬢寒刻志鑽書史篝燈照夜闌學
術三代上文章兩漢間胸次秋沆瀣詞吐玉琅玕冤哉
命壓頭那復博一官二壩策科第亦不到金鑾友堂紛
遺稿幾成汲塚殘江東兵燹餘白壁喜重完會當乞鴻

筆清名期不刊

己未試監假道于嚴報謝使君

秋試賢闕擲雉盧道經鄰郡拜真儒棠陰日暖鳥聲雋
苔跡月明吏影懼春野一犁今有犢暮歌五袴昔無襦
片帆願借吹噓力一舸清風不用租

嚴郡謁烏龍廟遇打碑者

何年故處士靈魄此為家古壁填蒼蘚空庭隘落花山
墳穿去鶴廟祭下飢鴉巫祝打碑賣神功播海涯

春晚

萬綠叢中春事闌
楊花如雪滿江干
露沾花樹蝶衣重
雨著片泥燕嘴寒
愁到吟腸詩綰斷
夢依棊局客敲殘
何時買得青山住
煉就蓬壺換骨丹

古岩寺

古巖靈蹟異
故故兀吟鞍
石溜濺碁濕
松風沍笛寒
露華僧衲重
曙色佛燈殘
白社開何日
談經上石壇

見王廣文

金瓶梅詞話卷三十九
旅食京華不自謀，可堪典盡鸛鷺裘。
一牀風雨孤燈夜，千里江山兩鬢秋。
笑索寒梅吟苦句，醉拈秃筆掃窮愁。
學人翻笑孫明復，強乞希文一點頭。

牛渚山觀大江

巨靈劈破蒼山石，鞭起九龍入空碧。
山分兩半合不成，夾住長江數千尺。
九道驚湍相擊撞，雷聲怒發誰敢當。
神蛟出沒不可數，往往殺氣摩穹蒼。
嗚呼蜀道行且難，劍門險似鐵門關。
一夫可敵萬夫勇，大開棧道通殺函。

固知長江當城壁立此天塹限南北東南王氣無窮年
此江未必成桑田君不見金亮百萬鼓長風海舟出關
一掃空書生不能長鎗與大劍只坐帷幄收奇功

秋深過田家

策杖行行過石橋農家雞黍遠相招田鋪碁局露鴉下
山展畫屏煙雨描病骨枯于秋後葉詩懷雄似海東潮
一聲老鶴松梢上騰欲乘風到九霄

春日松陰小憩

瘦筇扶我過林端
無狀東風掠鬢寒
貪數青山不知去
松花吹滿石棋盤

水邊早梅

梅花淡淡著寒烟
漏春光老屋邊
會彼清池寫疎影
一枝分作兩枝妍

繁昌道中

江天日暖竹為輿
獵獵春風載此臞
湊入灞橋成一畫
揚花吹雪糝吟鬚

讀十七全史歲久而徹

燈火青編結興長可能歷歷記興亡
董狐筆底風霜重班馬書邊蘭蕙香
往事輸贏碁幾局浮名今古紙千張
重重公案休拈起中有靈臺定否臧

題國直先伯祖海潮賦後

銀山突兀蒼海頭夜半鼓噪萬貔貅
爭雄角力轉坤軸旋磨塵世偕浮漚
朝朝暮暮自消長誰言于此墮海鱗
鷓革裹尸已成土未必怒怨卒未休
看公立論屈前輩

筆端有力挽萬牛孤峯絕崖氣象古亦復粲粲珊瑚鉤
分明掘見陰陽根判斷造化之深幽玄機發泄天帝嗔
此文正恐雷霆收不然亦似畫鳥跡長夜鬼哭聲啾啾
公自騎鯨去不返滿江明月蘆花秋

過和州報恩寺唐張籍故居也

昔年此地著書人詩骨成塵草木深突兀眼前僧結屋
塔鈴風裏替君吟

烏江項羽廟

蓋世英雄只恁休千年遺恨大江流漢提義帝作張本
當日君輸第一籌

連雪五日有無盡觀

平生酷愛雪老我看不足安得走五臺六月漱寒玉無
計巢雪山與物結幽獨方輿多奇觀出門欠車轂天公
副微願連朝遣滕六寒林振琳琅朔風煽瓊木樓臺炯
夜光地靈驚玉局幻成銀世界一旦飽雙目清冷天地
氣吸入空洞腹臏欲呼夜舟飄然訪林麓

登金陵鍾山絕頂

萬仞鍾山著屐登中原今隔幾峻嶒自憐不及天邊雁
歲逐春風到八陵

張麗華墓二首

金井轆轤春夢殘香魂飛不到長安君王為虜妾為土
夜月空分兩地寒

結綺臨春跡已塵尚餘杯土鎖娉婷玉顏不及隴頭草
歲歲春風吹得青

王荆公讀書堂

六籍紛紛盡可奴翻騰字說乃畱畬可知山半青燈夜
只讀商君一卷書

登長干寺塔

金陵王氣已銷沈幾度凭闌愁滿襟往事僅存南北史
傷情空費短長吟龍蟠故國山河壯鳳去荒臺草木深
舊物尚餘吳塔在夕陽移影照江心

詩境

流水環詩境未容塵土侵步迂松逕曲坐占艸堂深秋
句蛩分和山杯鳥勸斟好懷無客共相對一瑤琴

哭羅潛齋

此老古之學文章富石渠宦情雲淡薄吟鬢竹蕭疎未
購茂林稿空埋汲冢書北郊相弔處寒日照躊躇

漫題

放曠疎林下清風吹鬢毛傍梅讀周易對酒歌離騷詩
思秋雲淡古懷明月高五湖天地別烟水綠平篙

二二二

兩宋名醫小集

九

兩宋名賢小集卷三百三十九

欽定四庫全書

兩宋名賢小集卷三百四十

宋 陳思編

元 陳世隆補

古梅吟藁四

過淮南湖

黃塵茫茫北風起黃蘆蕭蕭日色死百萬征夫血怒流
點汚淮南一湖水向來失著圖中原一朝此地化為邊

養兵百年不用力將軍金印慙空懸
南湖南湖君莫渡
萬仞山高鬼門戶夜夜青燐照
斷蓬訓狐自戴髑髏舞

泊真州方山下

煙冷隋宮草木秋屏山分翠接江流
片雲不隔長蘆寺
夜半鐘聲敲客愁

有所思

乘鸞人去玉簫寒雲斂巫山曉夢殘
抑線不堪繫離別
自和煙雨搭闌干

戊午詔與弟文戰棘圍自慚師血況有炊臼之夢
不能為懷幸故人有薦鄉書魁漕闈者良以自慰
霜葉秋風下寒窓著病身乾坤為逆旅歲月轉車輪白
首無賢婦青雲有故人愁懷今日解漫啜甕邊春

先曾大父作竹夫人銘北窓蘧蘧偎爾冰肌毋徇
其名乃邪其思甚有思致余不能道漫作俳優語
水沈為骨玉為肌專寵涼臺會有時長得夫人容兩足
容星不遣史官知

雨宿祁門道中

乘駮古渡頭景色十分幽山雨敲詩夢溪流赴客愁寒禽知警夜高樹故吟秋壯志難磨盡終期汗漫游

登當塗凌高臺

高臺突兀玉千尋尚想當年翠輦臨坐守夕陽移半塔我吟未了讓蟬吟

曉發黃池過寧國

簇簇人煙兩岸分暫時掛搭此行程一筇風月無拘束

又復挑詩到宛城

登宣城郡樓仰謝公

翠屏四面敞闌干
謝老詩情不說官
魂冷青山呼欲醒
吟聲滲在石泉間

歸途績溪界喜見十里岩

策杖前溪去吾鄉
此路分雨磨山出色
風約水成文
歸信憑秋雁
思親望白雲
碧岩今日見
快飲帶微醺

自建鄴歸至績溪迂路觀石照

誰磨白石如冰鑑
勲業安能試一窺
但覺秋風上潘鬢
半因為客半因詩

內丹

太極虛空亦有根
打開闕捩是何人
丹田旋轉乾坤索
碧海循環日月輪
久矣我前曾有我
悠哉身外豈無身
分明好箇通天竅
只要時人認得真

外丹

手掇乾坤鐫裏煎
神仙肘後有書傳
紅鉛黑汞一斤藥

陽火陰符六百篇金鼎自凝三素炁玉爐輕散九霞煙
玄霜糝入空虛腹一息乘風上碧天

對月

長空有明月與我良有情遙遙萬里道隨我杖屨行
耿耿牀間相隨入枕衾而我病風雅長作秋蛩吟吟聲
悲入月月色寒人吟月即是天眼照我淚縱橫垂垂
上露盡從月眼傾不為富貴兒只作苦吟人君看朱門
邃翠幙圍陽春管絃沸清曉銀燭正熒熒

題西湖畫軸

丹青誰寫滿湖蓮
濯濯西施一段妍
汴水百年塵隔斷
可無人作畫圖傳

登嚴子陵釣臺

萬乘從君脚底眠
客星便入史官占
東都基業隨流水
今日斯臺尚姓嚴

栽班竹

竹母初分種屋頭
斑斑淚點帶詩愁
他時看取成林玉

遙剪湘江一片秋

縣尹先伯祖家觀遺書

嗟哉吾伯祖文響玉珊珊高折蟾宮桂卑棲花縣官琴
聲流水盡書卷白雲寒尚想伊吾夜高樓幾倚闌

春山晚望

模糊數疊屋前山翠色欺凌詩鬢寒啼鳥一聲泥滑滑
晚鐘春雨過林端

讀董卓傳

金方口人
卷三百四十
巨妖吐毒氣如蒸誰遣腥羶漢帝陵烟斷洛陽殘火在
為他吹著點臍燈

春日書所見

寒雲漠漠暮天低社鼓聲中日欲西
隔岸垂楊遮酒店
風帘移影照寒溪

春懷

梨花院落雨初晴小醉醒來睡不成
過客光陰易老態
故人山色却長情歌喉噫噫鳥聲雋舞袖翩翩蝶翅輕

好景相看作撻盡閉門不覺了清明

昭君怨

漢家金屋貯娥眉六宮何啻三千姬中有一姬傾國色
可憐不到君王知毛生筆下真少思玉顏黑子迷妍媸
君王按圖不入眼出身遠嫁單于妻盈盈淚眼邊月照
蕭蕭愁鬢朔風吹不憂死作龍城鬼貞魂長在深宮裏
猶勝男兒未貴時咫尺金門如萬里

飲馬長城窟

漢兵北伐時飲馬長城窟此城何以高中填戰夫骨此
池何以深戰血化為汁秋風吹水腥馬聞亦辟易馬渴
可奈何要馬載金戈長安有游冶走馬燕支坡

餞王廣文

宦居三載滿嚴駕出山城詩擔梅花白離杯竹葉清更
籌催客夢斥垠記行程去去驂鸞鶴長歌上玉京

寓興

盈盈樓上仙家妹綠波濯濯明芙蓉感君恩情玉連鎖

羅襦繫君雙明珠青瑣玲瓏春夜永為君閒調相思引
瓊樹朝新壁月滿琴聲未斷腸先斷剪剪輕寒襲春筍
金猊噴香薰袖暖

夏日書事

東林數間屋長掩竹笆籬
搯柳拂棊局瓶花落硯池
蝶狂如被酒蟬咽似吟詩
脫帽掛岩石淒颯入鬢絲

艸堂

蒼烟落日艸堂深
淺淺寒侵白玉簪
等客不來童睡去

自搖修竹和新吟

夜吟

小院沈沈夜欲闌
東風吹月上闌干
手撼梅花露研墨
醉將吟筆蘸清寒

荷花

花列千行彩袖收
萬斛明珠可惜坡仙不在風情絕
勝西湖

升仙謠

衣縹緲佩丁東金莖滴香露玉樹生涼風衝破青冥跨
黃鶴身披星斗珍珠絡

輓徐縣尹

雄筆工褒貶登科年少時青山知宦拙白首尚書癡
鷄薦仍歸弟鳳毛喜有兒傳家遺卷在光彩玉離離

贈相士

萬里煙霞侵鶴骨九天風露注蟬尸君看個人作詩苦
梅花細嚼當晨炊

春郊即事

登臨故故檢春工
小立蒼苔數落紅
院宇人歸春寂寂
秋千閒在月明中

寄題友梅堂友梅乃竹洲先生孫也

公昔洲多竹而孫梅作堂
月窓傳瘦影風壑度寒香
友也真魚水兄兮可雁行
相看動吟興時吐玉琳琅

甲子舉中補濫忝前名考官劉簿云已在解選滯
澆表簿批有文字清快老健惜乎正榜之額有限

之語

奴顏婢膝浪驅馳
幾被秋風吹鬢絲
百萬博盧空得雉
八千兵潰豈因驢
功名付我銀鑿落
世事從渠鐵蒺藜
且跨蹇驢出門去
六朝故地要吾詩

秦淮二首

數里秦淮畫軸開
唐人賞後宋人來
無邊風月要酬答
一處旗亭買一杯

歌歇陳宮玉樹春
可憐商女亦成塵
老成惟有秦淮月

往日曾經照古人

金陵懷古

鍾阜龍蟠勢可竒
何年開此帝王基
東西日月磨今古
南北江山幾合離
六代衣冠荒艸下
中原臺殿白雲涯
春風吹落英雄淚
立盡斜陽未有詩

兩宋名賢小集卷三百四十

欽定四庫全書

兩宋名賢小集卷三百四十一

宋 陳 思 編

元 陳世隆 補

古梅吟藁 五

拜李謫仙墓

先生放曠士浩氣吞洪濛蓬池與紫閣軒蓋繹相從經
營紫河車破費十載功金鼎馴烏兔炎炎丹光紅一擊

混沌破落地尋無蹤神仙有水解戲劇驚愚蒙當年遺
劍履一鋪秋雲封我亦鑽玄學此心良券同竭來薦泉
菊紫騎疑相逢儼如真面目曉月印寒空

登采石望夫石

良人戍楚竟蹉跎極目天涯歲月多賴有江流是知己
有聲似和虞彥歌

登和州八公山昔年周師俘敵于此有碑屹其上

萬姓叢居一彈丸八公何在路漫漫中原北望已塵暗

邊地秋來又棗丹
獵獵陰風征骨亂
茫茫夜月鬼聲寒
老兵指點生擒處
峴首殘碑帶淚看

哭趙信菴二首

祥雲中屹祝融峯
秀出全材一鉅公
銀管曾提修國史
金戈幾出策邊功
九秋健羽橫空鷄
萬里威聲當道熊
譚國為前冀國後
汗青千古玉玲瓏

麟符玉策總兵權
手托江淮半壁天
大節有關宗社裏
深謀常畫廟堂先
三朝已表蟬冠像
八袞終逢雞夢年

不獨羊公碑尚在萬民墮淚滴湘烟

秋日綿溪

萬頃寒潭鏡面平數聲征雁叫霜晴
滿林落葉秋風老山路黃昏人少行

哭秋崖先生三首

氣節昂斯世先生千載人可憐
成白首猶只到朱輪茅取羣狙怒雪逢越犬
狷方離羅織辱身世已成塵

歐蘇喚不起文印屬秋崖大雅非常調
正音不類俳寒

江濯文思明月鏤吟懷傳業有揚晏遺書塚墓埋
昔年經盼目此日罷從游尤許為上足敢令出一頭聖
涯窺浩蕩學海探深幽一瓣南豐後他師不復求

吳越歸秋晚

湖海歸來晚園荒菊幾叢秋山吟骨瘦霜葉醉顏紅
影寒溪曲懷人落月中青燈滋味永不用哭途窮

座中咏蟬分韻得飢字

兩翼纔乾殼已離便升喬木最高枝銀牀落葉秋風裏

金掌盤歌曉露時
斷續翻成無調曲
悲涼做出苦吟詩
前身應是夷齊輩
高卧西山自忍飢

春晚野步

尋花籬下蝶牽引
酌酒林間鳥勸酬
山色不隨春態老
笛聲自起夕陽愁

寓感

周家敦八政
姬旦衡何平
秦家尚竒法
四海怨商君
鳳鳥時一鳴
梟鳥時一鳴
以為周一鳴
以為秦法重

滅爾族德重潤爾身天帝厭殺伐勿使傷陽春

離怨

楊柳如少年春風吹得老朝為白雪花暮為浮萍草明月照妾夫夜夜關山道明月分半光照妾顏色好空閨一十年芳容秋葉槁寶馬嘶妾夫歸對鏡畫眉雙淚垂前日夫悞妾今日妾悞夫妾貌不如夫去時

故人見寄韻

青年鐵硯亦曾磨壯不如人可奈何松菊猶存陶令逕

烟雲不得邵公窩吟廊緩步看修竹醉石高眠枕綠莎
一笠一蓑吾事足江湖浩蕩白鷗波

樓居狂吟并引

新安梅翁吳龍翰學陶隱居作樓三層平生多好書
故作丹壁多好睡故作壺天多好游故作明月滄波
多好玄虛故作與汗漫期蓋其胸中有數千卷書眼
中有美少年不能好世俗之好而能好其所好如魚
飲水冷煖自知然則知梅翁者誰乎故自描寫其趣

云

茅齋梅著市廛間長與青山面目慳
突兀小樓初結就
竹牀石枕卧看山

樓間丹壁富藏書
悞學相如賈子虛
何不買牛勤教子
邵平瓜地要人鋤

覓得樓中一覺眠
將身化蝶入壺天
平生睡債何時足
春在梅花紙帳邊

湖海真成萬里游
寒風吹破黑貂裘
歸來卧占樓千尺

夢落滄波明月舟

汗漫相期欲控鯨
龜樓粗可寄閒身
天教吳猛親常健
乞與商山九斛塵

振衣千仞興悠哉
一日看山十二回
胸次誰人有丘壑
便容攜酒上樓來

四山如畫不勝奇
朝暮烟雲都是詩
樓上吟聲穿碧落
天公罰我鬢成絲

胸次玲瓏著九垓
政須時復興崔巍
樓高手可捫星斗

移掇天河入酒杯

諸方叅遍一枯藤
苦節期傳夜半燈
弘景登樓持捧喝
不容人上第三層

偃月爐深紫氣浮
紅鉛黑汞大丹頭
梅翁欲挹浮丘訣
專為黃山作此樓

附錄

古梅賦 并序

余家有古梅突兀富饒之旁
枝幹連理而茂先曾伯

叔大父聯武巍科曾大父嘗作連理梅賦以見意余
詩人也與梅為膠漆交梅而自古標格愈不凡敬依
韻扁吾窩因為之賦其詞曰

忻故園之古梅兮燦珊瑚之寶樹懸瑤臺之明月兮的
皦瓊花玲瓏玉蕊矧鷲比翼乎鐵榦兮乃連理而薦瑞
顧此槎牙兮其仰斯逆其偃斯醉其高斯達其低斯跂
鶴膝崢嶸切切交峙蛟背突兀犇騰之勢或橫枝照水
如紉蘭之湘纍或半樹粘雪如殮氈之漢使或荒山衝

寒孤根回暖如采薇孤竹君之二子烈士慷慨羈臣顛
顛茹鐵筋骨鏤冰腸胃乃導引其形軀兮如霧擁而雲
垂如鴻飛而虎踞故能曜其夜鶴之骨而枯其秋蟬之
蛻也若余者與伊納交廬其旁詔弟讀書對親奉觴呼
吸清寒嚙嚼清香而庶幾瀉吟筆之琳琅者乎

兩宋名賢小集卷三百四十一

欽定四庫全書

兩宋名賢小集卷三百四十二

宋 陳思 編

元 陳世隆 補

雪林刪餘

張至龍字季靈建安人博經史工文章一時江湖詩人多與倡和與靜佳朱繼芳居同建安生亦同歲投契尤篤至龍寄懷詩有借箸數同庚是也其詩用意

遠而語亦清峭雪林刪餘一卷寶祐三年自為序雪
林其自號云

宿靈巖

樹杪鍾樓出半層佛牀點鼠弄殘燈五更石上僧猶定
頭滿青霜喚不應

登東山懷朱靜佳

布石行山礪雲封竹洞名照池傳古貌借箸數同庚禽
闌巢幾覆蛛閒網半成冬深猶見菊還憶晉淵明

塞上曲

匣裏干將午夜鳴
碧油幢下夢魂驚
沙場燐火風吹起
牛在骷髏眼底明

紫微閣贈凌丹士

風林葉葉帶新寒
已譜齏鹽客味酸
兔抱粟眠傳道石
鹿銜花上拜章壇
沿崖取水和冰嚼
掃壁題詩當畫看
盡日玄房無俗話
山鐘敲月上欄干

送境山僧遊雪峰

海風迎杖錫半是往來程故國往來熟空門宿食清舊
房雲借住早路月同行象骨最高處師今履是平

齊雲寺

雨疎分點下畧約界橫塘接竹通生水寒蘿補壞墻宇
塗窓眼黑香染佛衣黃未晚螢先出蕭然兩畫廊

化龍閣

鏤滿留題屋柱間風吹醉面不知寒漁舟撐出垂楊岸
鷺鷥銜魚過別灘

吊蝶

數日偎紅氣力慵
化成長夢別春風
却憐蟻為埋香玉
昇入殘花土穴中

寄胡竹洲

野菜生根土亦香
寒林晴久漏春陽
山臨古畫開當戶
蝸學臨書篆滿牆
密竹旋刪嫌碍月
青柑遲摘待經霜
兒童閒取池頭水
剗破琉璃玉一方

題白沙驛

霧裏峰頭薄似巾路逢水後誤行人山泉釀酒力偏重
石銚煎茶味最真燕不傳家猶教子梅纔有月便生仁
枕邊學夢人方悟未到鐘聲夢更頻

贈劉介菴

一心憂道不開眉懶扣黃扉謁故知有累祇因難棄鶴
無疑何用苦求龜常厨飲食夷齊輩晚筆文章漢魏時
冷笑富家錢塞屋蘭亭誰更有真碑

馬升菴惠鞠苗

稅得隣東地一方旋栽黃鞠待重陽
春晨摘落青苗葉
按作秋花氣味香

東林寺

滿院香風乍熟楂
援孫抱子坐枯槎
科頭不慣迎賓客
自折芙蓉供釋迦

李梅礪雪夜留飲

擁爐收案牘市遠隔喧譁
妓唱新填曲僮分旋碾茶
花枝承雪重燭焰受風斜
僦屋為官舍更深酒更賒

欽定四庫全書

兩宋名賢小集
卷三百四十二

宿易沖妙道院

松髮經寒亂不梳
夜來風減屋茆疎
吟邊凍指僵如鐵
袖裏枯筇畫雪書

朱栢巖約南歸

思聞秋管悲猶未
定歸期吟咏窮邊長
艱難老後知水
寒魚上少月暗雁來遲
不作膏粱夢長令一劍隨

橫峰感事

石角多情挽布衣
候蟲送響出林微
文章首面超時好

字學偏傍狗俗非綠水被風吹作白密花因雨打教稀
歸鴉路熟知巢近直望松林盡翅飛

荅黃芳洲

抱膝書樓望太清一生心事月同明因過隣寺分茶供
閒取高僧史傳評

餞翁丹山發南浦

鳴鳩語燕近清明柳絮風輕袂水平一帶春流多斷岸
盡緣倒樹當篙行

點史

水草山光各自春
閒常謹坐百城身
忠言似藥偏醫國
好句如金不療貧
王伯興亡難諱史
彭殤壽夭不由人
感來莫計更深淺
秋見蒼頭換燭頻

採蓮曲

荷葉籠頭學道情
花妝那似妾妝清
雙雙頭向猶交頸
翻笑鴛鴦不老成

拘落圓房響釧金
背人細數子藏深
不嫌到手多尖刺

祇怕傷人有苦心

子期臺

拾葉題詩媿不才
袖遮微日上層臺
山僧分我松陰坐
隔岸花香渡水來

武夷山

九折蒼江轉葦航
花間流水自宮商
巖開天綫登無路
殿鑠仙金拜有光
曝背龜從平石上
避人猿向險枝藏
斷橋盍有重紅日
狂欲乘風和魏王

擬韓偓體

一聲阿鵲顫鸞雙學調新詞未得腔拜了夜香即喚睡
旋收鍼線背銀缸

題隱者壁

寒著麻衣餒食薇樂山清興只琴知蜘蛛圓網當中立
蜂從新厨出外飛山脊倚天無改日草根埋雪有青時
莫言鴻雁多相背去去來來共一機

雨中過陸家園

斜搭鞦韆窓半扃行人屐送隔牆聲羣花相倚唬妝面
苦不催晴怨懶鶯

寄茗川故人

千古長情祇翠岑休談點石化黃金秋來國事方嘗膽
病後禪機忽上心老眼看書嫌字細乾喉飲酒喜杯深
幾迴空檢斑衣篋望斷白雲天外陰

晚窓

風約鍾聲落耳根歸鴉點點不成羣前山野燒青煙起

散滿空中作暮雲

喜楊琴隱至

世塗多不平擇地度吾生
風靜花遲落雲移月倒行
自鈔間作改客借古琴評
凡事虛空裏何勞苦著情

寄寶林僧

磨折英雄輩無停日月梭
達人愁夢少明主直言多
藥試單方驗碑評近本訛
吟成無愛者寄與病僧哦

巴嶺

處處柴門掩半邊
鶯啼綠樹隔炊煙
竹梯閒倚柔桑畔
定是人家蠶正眠

楚郎西臺省鞠

鞠胎絲蕊未曾成
百種藜中半忘名
試檢記花牌字看
春籬醉墨欠分明

槎

槁形冷度幾晨昏
不受東風一點恩
却有仙人求作伴
浪游星渚到天門

古別離

扶上花驄酒半醺
望沈鞭影暗消魂
離情恐被行人覺
背拂菱花補淚痕

峽口

峽深猶有路泉遠不知源
禽學鄉談語山填野燒痕
晚風樵笛塢春日酒旗村
茆舍人耕暇鳧雛浴水渾

北津

獨立長橋喜近城
半闌斜日又催行
船過別浦波痕沒

堆立當塗里界明古木雲邊僧住處
落花風裏鳥啼聲
青山莫道渾無事自與行人管送迎

江常菴出武尼

厭居京洛說行時袖裏青蛇上武尼
仙為寫真供御覽
天憐病眼召神醫江中白石看龍斲
洞裏蒼松帶鶴移
無事出山衣屨溼滿城風雨鞠花時

晚步寄劉徵齋

縱橫屐齒印蒼苔
夢筆山高翠作堆
日帶晚光歸海去

風傳秋信下天來竹開小路通螢過松守空巢待鶴回
蚋窠乾坤還自樂何須金屋玉樓臺

簡勝上人

林深嵐氣重一犬吠寒煙高思天雲外新房柏樹邊愛
蒲尋石種惜茗瀝泉煎昔建如來殿老於師一年

演雅十章

麒麟感世出鳳凰覽德至人苟常見之應不指為瑞
欄蛛巧輕網林鳩拙營巢孰知拙反勝網壞巢獨牢

鶴食野人田燕栖公子堂野情飢亦樂依人難久長
猩猩殞機穽鸚鵡瑣金籠言笑適為累緘默斯保躬
蠶飽辦絲課蜂忙供蜜工役役為人勞衣食還自空
鵲鳴人共憐鳥鳴人共嫉祇因聲妍媸何心報凶吉
江鱗行比目沙鴛睡交頸不知山兔寒清夜顧蟾影
飢鷹健搏兔饒鷺勤哺魚各為口腹累不聞有弱虞
犬眠蒼玉地猫卧香綺叢倘無鼠與盜猫犬命亦窮
墨魚黑覆形火螢明照身拙於用顯晦蹤跡從自陳

寓興十首

孤燈照長夜膏盡燈影滅
劃見窓戶間鮮鮮有明月
日夜江水流下海水不止
孰謂流去者不是海中水
東日照瓦霜西向界餘白
莫言日不到日光來未及
遲日上深夜新蟬不終夕
何如月圓時通宵照無極
種菊一百叢九月開盈枝
莫言無好花好花開較遲
庭前無繁植疎竹附梅坡
雖然無巨蔭明月飛來多
草蟲設細網纖細不可見
日日朝露中羣白草間見

高風吹秋霜庭前百草死誰知草有根昨夜東風起
夏月灌菊根見花在秋日先時不施工臨花已何及
十年插柳枝今與高樹齊垂條緣春風上有流鶯啼

梅花十詠

梅梢

根清條不肥影落明月地淒淒欲寒時胚暉已生矣

苔蕾

歷歷銜冰霜綴作珠的皜香色俱渾然花中之大極

欲開

凝成姑射姿幽潔世所獨春近迫芳心羞澁破唇玉

半開

五出稍敷露不愛塵目愛鮮鮮著精神獨於此時最

全開

昨夜東風多花神莫之禦玉立對幽人十分盡情吐

欲謝

垂垂雪中枝暗裏度香遠忽動瑩機黏枝花力軟

半謝

旋隨瓊霏飛繞我茆屋角結子意漸濃豈為羌管落

全謝

冰花不留丁收香盡葳白一朝作陳人遜與桃李出

小實

青青長朱棠小摘胞不墮勾欺如豆微中懷仁已大

大實

圓碧日益肥磊落壓枝重雖然苦味酸酸中葳大用



兩宋名賢小集卷三百四十二

欽定四庫全書

集部

兩宋名賢小集卷三百四十三

三五

詳校官中書臣閔思毅

助教臣常循覆勘

總校官編修臣王燕緒

校對官編修臣王天祿

謄錄監生臣徐豫吉

欽定四庫全書

兩宋名賢小集卷三百四十三

宋 陳 思 編

元 陳世隆 補

高峯別集

廖剛字用中南劍州順昌人宗寧五年進士紹興中
歷官御史中丞工部尚書以徽猷閣直學士提舉
州明道宮卒有高峯集

代祖父次韻酬羅君寶見寄

公祖名丕
父名懋

蕭條門巷陋于顏
老去青春僅得閒
心畫傳家無計策
手談留客漫機關
靜思往事千年上
俯歎勞生一夢間
多謝光臨無別意
為聞流水與高山

題楊子光雙溪閣

倚天華棟俯長洲
渺渺雙溪一檻秋
匹馬問津迷去路
亂帆分港競歸舟
花飄兩洞紅交浪
影落三山翠合流
清夜鳴榔何處曲
冷光平泛玉簾鉤

和逸道春雪

春雷未發春工淺
春雪濛濛日華曉
戶玉樓迷舊燕
晚村瓊樹點寒鴉
籠金尚礙鶯穿柳
覆錦猶妨蝶戀花
憑仗東風吹更暖
桃源端欲訪仙家

題雙泉堂

疊翠倚崢嶸
森然衆木榮
兩條寒玉迸
一檻暑風清
幽意憑分瀉
微瀾更合成
誰知闌闌裏
扃戶小蓬瀛

題南墩鋪

欽定四庫全書

兩宋名賢小集
卷三百四十三

見說龍巖路猿啼今始聞深林埋宿霧高嶺出層雲天
去頭三尺崖垂足二分只愁雙目眩敢恃一杯醺捫歷
泥增滑瘡痛日向曛長安九軌道誰識此艱勤

和周材雪詩

蜡雪緣何喜春工屬此興宿苗沾潤足盤氣滌除仍亂
舞隨空遠輕黏徹體凝漫天飛滲玉極目皎鋪繒帶雨
聲初急搏風勢轉增危簷飄邃幕疎屋灑寒燈瑟縮鴉
棲怯跳梁犬力勝須臾平坎窞頃刻沒哇媵梅李看山

木瓊瑤數塔層寢眠寧有道賦詠愧非能郭履愁離席
孫窗但枕肱凍從金井水清挹玉壺冰銀闕何勞問雲
臺取次登漁蓑真好畫柳絮足多稱粟冽驚殘歲淒涼
感舊朋戴君聊欲訪郢調忽難應綺席交銀竹清河映
玉繩詩成陵鮑謝酒渴飲淄澠天朗醒孤鶴風高激怒
鵬齋宮初入夢曉鼓數聲鑿

次韻當時長官院中三絕句

柳嫩風吹綠花嬌雨妬香欲憑羲馭緩莫遣負韶光

簷雀矜巢梁桑鳩喚婦鳴客愁饒餽釘牆外賣花聲
畫舸便春漲驕馳惜漲泥歸知何所愜烟柳子陵溪

還憩旅店茅軒

茅軒有何好小駐客心寬始覺安居樂無如行路難

題渚宮

畫橋紅去卷蛾眉臺榭遺踪草樹迷獨有天然無限意
一池春水浴鳧鷖

萼草春深綠更齊玉鞭何處選芳菲舊時錦繡叢中蝶

却傍疎籬野菜飛

衢州試院次韻盛當時官長寵示絕句

洗眼貪看幼婦詞
玉人空遣暗相思
憑誰為報歸期近
趁得桃花爛漫時

丙申春帖子

土牛分盡彩泥香
動地歡聲入壽觴
倍覺今年春意好
上元燈火鬪風光

碧波樓下銀塘暖
麗日亭前瑤草新
和氣滿城催燕樂

風流太守最宜春

暖風漸綠池塘面
和氣先薰草木心
欲識春來何處好
曲屏新稱畫堂深

金裁寶勝翻珠髻
雲染華箋貼繡楣
庭戶春歸何所覺
暖風吹雪下瓊枝

題蔡州柳莊浦

雲垂曠野路漫漫
策策秋聲作暮寒
已分故園天樣遠
不知何處是長安

題白鳥寺西軒

幽牕殘夢午聲鷄犬吠人家草舍微惆悵十年無限事
又聽啼鳥送春歸

天竺寺

野塘風細度香蓮碧澗雲深響玉泉從此西湖不須到
淡烟寒月一家天

題臨漳臺

銀河一派接天來碧玉千峯照眼開我欲乘槎訪仙去

却疑身已在蓬萊

畫棟岩堯倚翠微
玉簫聲斷紫烟飛
憑闌萬里秋光老
誰會長吟久未歸

兩宋名賢小集卷三百四十三

欽定四庫全書

兩宋名賢小集卷三百四十四

宋 陳思 編

元 陳世隆 補

飲冰詩集

宋慶之字元積一字希仁永嘉人咸淳進士有飲冰詩集

蘭溪道中

朝買蘭溪船暮泊香頭市如何十月天復此連夜雨朔
風寒似鐵曉色暗如土道行不見人路哭疑是鬼棲棲
遠方士忽忽鄉心起落葉響疎庭空燈照寒被離家能
幾時旅況已如此茫茫楚山雲渺渺楚江水屈指計行
程此去復萬里

開爐日賦

筋力已非舊逢寒亦自憐風霜在簷外妻子語燈前紙
被添新絮茶甌煮細泉雖云方寸地春意一陶然

稽村

雪後寒增健貪幽愛路生羣兒燒葉坐一鳥啄水行山
色晴猶慘梅花謝亦榮小輿風割面微醉任敲傾

哭趙東閣

秋風慘欲割秋月明不發誰令聲名高竟使壽命折往
年失四靈詩道微一髮縞素革織組宮徵節亂聒力排
唐末陋意與風雅軋清廟不待陳黃壤詎能沒新篇今
寂寞故墨慎無忽

項園即事

時節飛花盡幽林亦自香閒來看新水獨立又斜陽
簷角鳥鳴霽樹根魚就涼一春風雨過游事極相妨

次惠上人冷泉夜坐

此景寫不盡此懷誰與俱月來林影碎雲去石頭孤
萬籟各休息天香乍有無因師寄佳句清夢更勞吾

郊行偶成

野水連天濶孤舟盡日間會須風雨過一濟諒非難

碧鷄州堂呈劉後村

斯文海內聲名濶，猶是乾淳一脈餘。
須信昌黎曾得謫，可憐太史未成書。
碧鷄有地吟詩老，金馬無心待詔初。
甚欲見君三十載，春風今日侍中車。

寓武昌報恩寺

孟宗祠下竹依然，借得空房竹樹邊。
貧寺少逢僧過夏，遠鄉多是客經年。
倩人汲水時煎茗，就佛分燈夜照眠。
家信不來心欲斷，明朝又買漢陽船。

武昌懷古

極目平蕪送落暉六朝征戰尚依稀風生戰舸周郎過
月落南樓庾老歸秋塞戍閒番馬病春江流下蜀魚肥
神州北望知何處父老猶能話岳飛

放翁有五更讀書示子詩予亦次韻

秋風蟋蟀牀下鳴茆茨耿耿秋燈明老夫掩卷發深喟
起視河漢初參橫世人飲食幾知味眼底古今復涇渭
藩籬是筆屋是書風葉塵埃力空費六籍在天日月存

我亦收拾還本根此事兒輩未可論紛紛場屋爭作元

兩宋名賢小集卷三百四十四